


Promé
Pasonan



Buki 3

DOS POTRÈT

Lès 1

Tempu di Hesus, no tabatin kodak. Nos no sa kon Hesus a parse. Ma ta komo sifuera Hesus tòg a laga dos potrèt pa Su siguidónan. Un di nan ta Sena di Señor i e otro ta boutismo.

SENA DI SEÑOR

Les Marko 14:22-24.

1. Kiko e pan ta representá? _____
2. Kiko e djus di wendrùif* ta representá? _____

* Ta bon pa akclará ku e kontenido alkohólico den e “biña” ku hudiunan a usa tempu di Hesus tabata hopi mas abou ku e ta awendia. Pues, por yam’ é trankilamente djus di wendrùif.

LITERAL OF SIMBOLIKO?

Algun religion ta kere ku e pan i djus di wendrùif ta bira e kurpa i sanger di Kristo durante Sena di Señor. Esnan ku ta partisipá ta kere ku nan ta risibí Kristo den nan kurpa. Ma ta klaro ku esei no por ta e kaso. Ta bèrdat ku Kristo a bisa ku “esaki ta Mi kurpa...esaki ta Mi sanger” (Mateo 26:26,28). Ma kòrda, ku Hesus mes tabata presente fisikalmente ora El a bisa esei. Hesus no a kita un pida di Su kurpa duna Su disípelnan (promoviendo kanibalismo). Ta klaro ku Hesus Su palabranan tabata simbólico. En realidat, nada mágiko ta sosodé ku e pan i djus di wendrùif. Nan ta keda pan i djus di wendrùif durante e Sena di Señor. Hesus a introdusí uso di e dos elementonan aki komo un rekordatoria simbólico pa Su siguidónan di Su kurpa kibrá i Su sanger dramá pa nan. Kiko Hesus a bisa dos bes durante e Sena di Señor (1 Korintionan 11:24-25)?

KEN POR PARTISIPA?

Ken ta esnan ku a partisipá den e Señá original ku Hesus a introdusí segun Lukas 22:11?

Sena di Señor ta solamente pa hende ku ya kaba a konfia Kristo komo nan Salvador.

Esei ke men ku kualke kristian por partisipá? Nò. Kiko un kristian mester hasi promé ku e tuma parti den e Sena di Señor (1 Korintionan 11:27-29)?

Ta un kos serio pa tuma parti den e Sena di Senór ku piká den bo bida. Dios no ta hasi wega. Kiko por sosodé ku un persona ku ta partisipá den e Sena di Senor na un manera inkorekto (1 Korintionan 11:30)?

BOUTISMO

Boutismo ta un ordenansa ku Kristo a duna Su iglesia. Dor di e síglonan, kreyentenan a sigui e mandamentu aki, asta tin ora ku peliger di nan bida. Awendia, tin hopi pensamentu inkorekto tokante boutismo. Kiko Beibel ta siña tokante boutismo?

KEN MESTER BATISA?

Les e siguiente tekstonan, anto skirbi kiko mester sosodé promé ku un persona por batisá:

Marko 16:16 _____

Echunan 2:41 _____

Echunan 8:12 _____

Echunan 8:36-37 _____

Echunan 18:8 _____

Studiando e tekstonan aki, skirbi den bo mes palabranan ken ta e úniko personanan ku mester batisá?

Pues si un persona ta batisá sin ku el a konfia Kristo pa su salbashon, e boutismo ei tin balor? Si Nò

Si esei ta e kaso, kiko bo ta haña di un hende ku a batisá promé ku el a aseptá Kristo...kisas komo beibi. E mester batisá di nobo? Splika bo kontesta.

Tin un otro problema ku boutismo di beibi. E no tin e abilidadat pa komprendé kiko ta salbashon, ni tampoko kiko ta boutismo.

Boutismo no ta salba. Boutismo ta un demonstrashon ku un hende a konfia Kristo pa su salbashon. P'esei ta solamente hende ku a aseptá Kristo komo nan Salvador ku mester batisá. Pues, boutismo ta algu ku mester sosodé solamente ún biaha, na komienso di e bida kristian.

PAKIKO BATISA?

Boutismo ta un parti nesesario pa un persona por ta salbá? Kòrda ku un di e ladronnan ku tabata krusifiká huntu ku Hesus a konfia den djE. E no a haña chèns pa batisá. Kiko Hesus a sigur'é tòg den Lukas 23:43?

Pakiko anto mester batisá?

1. Boutismo ta un testimonio públiko ku bo a konfia den Hesu-Kristo pa bo salbashon. Ora bo a aseptá Kristo, esei tabata un desishon personal privá. Boutismo ta komo sifuera bo ta duna un anunsio públiko, “Di awor padilanti, lo mi sigui Kristo!” (Romanonan 6:1-5).
2. Boutismo ta un mandamentu pa obedesé. Hesus a duna instrukshon na Su siguidónan pa batisá esnan ku ta konfia Kristo pa salbashon (Mateo 28:19). Ora un kristian ta batisá, e ta someté na boluntat di e Rei nobo ku ta sinta riba trono di su bida, Kristo. Pa nenga batisá ta desobedensia i esei lo stroba bo relashon i komunión ku Dios.

KUA MODO DI BOUTISMO?

Religionnan tin diferente manera ku nan ta batisá esnan ku ke sigui nan siñansa. Algun ta basha òf sprèngu awa riba e persona ku ta batisá. Beibel ta mostra mas bien riba un otro modo di batisá: inmershon. E palabra “batisá” ta bin di un palabra griego βαπτίζω ku ta nifiká “pa hinka den awa”. Ripará tambe ku tantu Hesus (Mateo 3:16) komo e ofisial di palasio di Etiope (Echunan 8:39) despues di batisá a “sali foi den awa” indikando ku nan tabata den e awa. Juan Batista a batisá unda “tabatin hopi awa” (Juan 3:23), loke lo no tabata nesesario si Juan a basha òf sprèngu algun gota di awa so riba e persona.

TAREA PA KAS

1. Siña Mateo 28:18-20 fo’i kabes.
2. Konta un persona kiko Kristo a hasi pa bo.
3. Sigui fiel ku bo tempu ku Dios tur dia.
4. Lesa e siguiente lès i yena e kontestanan.